


84 (2 Рос-Ко)

Б12

Вячеслав
БАБИЧ

БУДЖОС

БУДЖОС



Вячеслав
БАБИЧ

ВУДЖОС
ВУДЖОС

Кывбуръяс

Сыктывкар
Коми книжной издательство
1995

84. 2 Рос-Коми

Б 12

Бабин В. Л.
Б12 Вуджөр. Кывбуръяс.—Сыктывкар: Коми книжной издательство, 1995.— 48 л.б.

ISBN 5-7555-0527-6

Вячеслав Бабин олö да уджалö Кулöмдiнын. Том поэтлысь кывбуръяссö ми аддзылам "Войвыв кодзув" журналысь, йöзöдöма "Парма гор" öтувъя сборникын. Коми книжной издательствоын авторыслөн петiс челядьлы сиöм медводдза книга.

"Вуджөр"— В. Бабинлөн выль гижöд чукöр, кытчö пырисны бөръя воясö гижöм кывбуръяс. Тiянлы, коми поэзия радейтысьяслы, и донъявны найöс.

84.2 Рос-Коми

Б $\frac{4702310200-033}{M 128 (03)-95}$ 36-95 м

ISBN 5-7555-0527-6

© Бабин В. Л., 1995

© Моторин В. А., художник, 1995

© Коми книжной издательство, 1995

ЕДЖЫД ДА СЬӨД

МАМ

Медым лоны чужан мулы пиён,
Этша на, кор сыланкывъяс сиан.
Да и лөж, кор долян: "Дона, муса" —
Он өд сійөс базар вылын вузав.

Кывтө песны өні быдөн сяммө,
Сөмын таысь кокниджык мөй мамлы?
Долыд өмөй, кор юр воштөмөн сылам,
Но а шогсө-дойсө огө кылөй?

Ичөт дырйи бөрдлім мамлөн сывйын —
Бурөдны пыр кужліс сыланкывйөн.
Өні асьным — төдөмөн и төдтөг —
Мамлысь бөрдөм сыланкывйөн пөдтам.

Кедзовта ме чужанінӧс ёна,
И ог кӧсйы сылӧн пиӧн лоны.
Кыдзи кӧть ті сэсся менӧ ёрӧй.
Важ моз ог нин "радейтатӧ" горӧд.
Чужанінӧй быттьӧ шляйтчысь баба,
Кодӧс сӧмын эз нин ылӧд тшапа,
Сэсся дзыкӧдз пӧрччысьны на сетчис,
Лэдзис пырны гусяинас, сэтчӧ —
Медся-медся вежавидзан дорас...
Со и ёрӧй кедзовтӧмсьыс, ёрӧй.

ГӖСТЬ

Уна вежӧса батылӧн керкаын
Гӧстьӧс виччысям зэв нин дыр.
Сӧмын та гӧгӧр сӧрни бергалӧ,
Кӧть эз ставлӧн и гажыс быр.

Ӧти семьялы, ӧти котырлы
Тайӧ гӧстьыс и бур и лӧк.
Олӧм катовтчас эськӧ кодарлань?
Ваяс шуд сийӧ али шог?

Кодкӧ зумыш, а кодкӧ сералӧ —
Татшӧм здукӧ тай воштан ин.
Локтас Ягмортӧн либӧ Пераӧн —
Ставлӧн гӧсть вылӧ аслас син.

Уна вежӧса батылӧн керкаын
Гӧстьӧс виччысям бура дыр.
Венсьыс керканым киссьӧ-жеркалӧ,
Гӧстьыд повзяс да оз и пыр.

ВИЛЬЫД

Йиа му вылын вильыд,
И конъясьны верман быд здукö.
Сідзи ветлыны зіля,
Мед аслам жö кокöй эз крукöд.
Кыссьö конъясöй увтi
Менам туй, дзик жö олöм кодь ыджыд.
Кöть и конъяся — сувта,
Тайö муыс мен медся бур мыджöд.

ГОРТӨ

...Да, вөлі зумыш-букыш зэр,
Да, вөлі муөдз лякөм турун,
Да, вөлі вөрлөн мугов сер,
И вөрсьыс өвтис тувсов нюрөн.

Ме локті нильөг туйөд сэк,
И киссис көм, и воймис шабур,
Но некыт веськыда эг чег —
Мөд ордым гортө меным абу.

Эг вильыд вөлөкысь ме кеж,
Эг чорыд веркөс вылө чиктив...
Зэв уна олөмад туйвеж,
Но өти локтө чужан сиктад.

ПАМЕТЬ

Еджыд ялаа ягын,
Зыбуч нюръяслөн
Коркө вөлөма лагерь,
Тані, дзор коми вöрын.

Гөгөр крестъястөм гуяс,

Гөгөр сутуга пратьяс.

...Нора шувгöны пуяс —

Быдөн веськыд и статя.

Ёрсьö сывлытөм пужйыс

Став том пожöмлөн юрын,

Оз тай паметъсьыд вушйы,

Мый тан аддзывны сюри.

Шуштөм зонаыс шөрö

Йöра вуджöртлö-волö.

Гашкö, абу и йöра,

Гашкö, кодлөнкö лолыс?

ЙИТӦД

Овны-вывны мичаа да кузя
Менам пӧльӧй кольӧдчигас сиис.
Во джын мысти ылі муын усис,
Колис ӧткӧн дас арӧса пиыс.
 Ме ог донъяв, мичаа ли кузя
 Олӧм-вылӧм батылы Енмыс сетіс,
 Кӧть и Рӧклӧн джаггӧрӧдас шедіс,
 Кӧть и дзикӧдз бӧръяпомыс юсис...
Пиӧй менам пӧльлӧн нимӧн шусьӧ,
Ӧні сылы дасӧд вылӧ петіс.

ДӨВАЯС

Шогсө морөсад он тай йөрт өні,
Сьөлөм нюкыртчис, быри лов:
Орччөн дөваяс нора бөрдөны,
А сөдз ывлаын — ов да ов!
А лөз ю вылын ытва лөсталө,
Гыа отыслы — пом ни дор.

Ваас кодзувъяс шондї öзталө,
И быд кодзув, кыз синватор.

ВЕРСТЬӦ СИНГЪЯСӦН

Лоис лӧнь ворсан пельӧсын. Тан
Мудзӧм пиуклӧн гӧлӧсыс ямис.
Ӧти чукӧрысь акань да танк
Пуктис джаджйӧ Андрюшалӧн мамыс.
 Лунтыр джодж шӧрын мунис пӧсь бой,
 Бомба потласис, таргис "максимка",
 Друг кӧ "ранитчас" юр либӧ сой,
 Аслыс ичӧт садатыслы нимкодъ.
Челядь, челядь, и мыйла нӧ пыр
Война тӧ воклы — медмуса ворсӧм?
Чача танксӧ ог вунӧд ме дыр:
Кор тай аканьсӧ муртса эз зыр,
Акань быттӧкӧ "мамукӧй!" горзис.

МЫЙЛА?

Кампузитчис карын коддзём зон,
Матьён-квасьён видіс кыдзи кужис,
Мыйла миян кык бана закон,
Мыйла бюрократлөн пыдын вужыс.

Некод сійёс өлөдны эз кут,
Быдөн муніс аслас туйод чөла,
Кодлы делө, зонмыс мыйла крут,
Мыйла чужём юёмысла руд,
А важ китель лацкан вылас — чут,
Мыйла ачыс том на, а кок пөла.

* * *

Еджыд вичкоас пыравны мен,
Вежа образлы копыртны юрös,
Сисьтор öзтыны рöдвужлы сэн,
Эскöм чужтыны водзö быд бурас.

Татчöс сшылысьяс пövстас ме ас,
Мыла горыс мен чужöмсянь тöдса...
Сöмын мыйла нö öдзöсас тас,
Сöмын мыйла нö вичкоыс пöдса?

ЭСКӨМ

Эм Сійӧ выліас, эм,
Корсюрӧ кӧть и ог эскы,
Йиджтысис Сійӧн юр вем
Кыз Рафаэльӧн фреска.

Эм Сійӧ выліас, эм.
Кылӧ, и аддзӧ, и тӧдӧ,
Сытӧг мый руд менам нэм,
Сыкӧд жӧ... еджыда-сьӧда.

ЕДЖЫД ДА СЬӨД

Мыйла еджыдось юсь да каля?
Мыйла рака да чавкан сьөдось?
Мыйла каля да юсьыс жальось,
Рака-чавканыс — ёрём рөдысь?

Кык рём костас век вензьём муно,
И оз лөсявны найө, чайта.
Юсьыд, нййтчас кө, ваө сунө,
Рака, еждас кө, пырө нйитө.

ЧУЖИ МОРТОН

*"От төд, коді менө чужтіс,
Коді быдтіс, вердіс-угіс..."*

Тима Вень .

ВИСЬТАСЬОМ

Менө гулыд ягыс быдтіс,
Помөс резіс вежа ванас.
— Öввө, өввө, парма быдтас, —
Вой төв окаліс пөсь банөс.

Менө лелькуйтигмоз лыддис
Шуда мойдъяс кыз пу раскыс,
Зараваон льольө пыдди
Сійө чөсмөдліс быд асыв.

Менө вильшасигон нөйтис
Зумыш Войпель көдзыд нөрйөн.
Верстямми, да пунктөм көйдыс
Шляка нетшкис, эз и бөрйы.

Менө, йөз вөсна кор бөрді,
Кодыр найөс водзлань нуи,
Пемыд потшөс сайө йөртис
Чужан муөй, чужан муөй.

ЧУЖИ МОРТӨН

Да, мыйлакө чужи ме мортөн,
Кор дорыньтчис арланьö гожөм.
Эг бобулөн — тіралысь бордөн,
А МОР-ТӨН — и ёнөн, и чожөн.
Эг дзоридзөн чуж, и эг пуөн,
А гөрддзаси мортөн ас муын.
И сьөлөмөй өдвакө умас,
Веж дзоридз моз, бобув моз, пу моз,
Тан вынсявны шонділөн гожөн,
Кор дорыньтчас арланьö гожөм.

ӨЧКИ ПЫР

Ичөт дырйи ворсіганым синмө
Меным вильыш ёртлиөн изйыс инмис.
Мед эз дзикөдз сиптысь да мед аддзө,
Өніөдз на көлдуйтөны врачьяс.

Стеклө пыр, но тыдалө на светыс —
Тайө шудсө Енмыс век жө сетис.
Сөмын югыд көдзыд стеклө пырыс
Ог тай аддзы муса челядьдырөс.

ВЕЖӨГТӨМ

Ёрткөд колим понйөс мөдлапөлө:
Дзибрөс пыжнад наридз пөвстөд полім,
Но а сійө бөрсянь дзоргис чөла —
Колис кө көзяин — тадзи-й колө.

Асьядорнас, кодыр кутіс йиис,
Понйыд вөлисыт вуджис, сьөлөмшөр.
Тайө кадсянь эг кут төдны сійөс:
Сөвтөда кор пыжө, нюлө киөс,
Мекөд лесьт, а ёртөй вылө — скөр.

НИМ

"Меным ас туяс кажитчө кӱин..."

Г. ЮНКОВ

Менӧ нимтисны кӱинӧн талун,
А ме паныд эг шу кыв ни джын,
Татшӧм нимыд кӧть сьӧлӧм оз малав,
Татшӧм нимсьыд кӧть нэмтӧ он мын.

Йӧзыс важысянь чайтӧны: кӱин —
Ыджыд горшлуна, скӧрлуна лов.
Збыльысь, вӧлі кӧ кидӧн да вӧйӧн,
Сэки пармаас эськӧ эз ов.

Мыйла кӧритны, суюсь кӧ да винӧв,
Кынӧмпӧттӧ ӧд корсьӧ быд гаг.
Сылӧн олӧмыс — гыжъяс да пиняс,
Сійӧ пон мозыд быдтор оз лак.

Мукӧд зверыс, кор тӧдӧ, мый кулӧ,
Кыйсьысь инмас кӧ пулянас стӧч,
Юрсӧ суйӧ сук вужляс улӧ.

А ӧд кӱиныд таdzi оз вӧч!

Бӧръя эбӧссӧ чукӧртас сійӧ,
Да и смертыслы паныд — оз тӧр...
Аттьӧ Енмыслы, меным кӧ сиас,
Медым кӱин кодъ вӧлыштис вир.

КОДЗУВКОТ

Оз и мудзлы кодзувкотыс,
Öти здук оз сулав,
Кыскö лыс и йöткö вотöс
Джуджыд коз пу улö.

Вайö турун, изтор бертö
Вöрса ичöt лолыс.

Сылön уджачлунлы, дерт öд,
Завидьтыны колö.

Ачыс гаг, а ёнджык мортысь.
Мый нö татчö шуан?
Ассьыс дас пöв сьöкыдтортö
Мортыд öмöй нуас?

ВОДЗАСЬӨМ

*"Петім кө, петім гөрнысө,
Гөрам кө, гөрам вөрөна вөлөн,
Көдзам кө, көдзам веськыд кырымөн..."*

КОМИ ЙОЗКОСТСА СЫЛАНКЫВ.

Кор дзикөдз гөрсис ректөм тыла,
Кор потшсис выльөн гөрөм муыс,
Зэв кокни лоис сьөлөм вылын,
— Вот регыд вунда! — аслым шуи.
Но локті няньла вөрсә йөрө,
А сәні сярвидзө том лежнөг:
Өд абу кокни парма шөрад
Нэмчөжся этшсө мулысь вежны.
Эз тыдав няньлөн гежөд шепыс
Гөрд лежнөгйылөн ойдөм дйын...
Тадз вөрыс ассьыс вынсө дзебис
Да менсьым төдмаліс на эбөс —
Сө ем, и өти көйдыс кийн.

Велөдчыны сьökыдджык
Кужом дорысь.
Кужиганыд некытчö он нин сорась.
Велөдчигад конъясян,
Асьтö ёран,
Коньөр сямтö-мывкыдтö
Песан-доран.
Велалан да быттьökö
Ноп тэ чöвтан.
Ышловзян, мый ковтöмтор
Нопъяд сöвтін.

ЫЛЫН

Мыйкө морөсын гудыр
И сьөлөмөй ортсө көть петас.
А өд вөлі ме шуда,
Медся шуда дзик пежасьом светас.
Кор и помасяс слөтыс,
Пемыд кымөрыс дыр-ө оз кылав?
Ола быттьөкө вөтын,
Ачым ас дорсянь сё верстөн ылын.

ВУДЖӨР

Юлөн веркөсын төдтөм вуджөр.
Дөрөм сосъясөс вылө пуджа,
Соддзөн койышта чужөм пасьта —
Со кор медбура кылан асьтө!
Со кор кыпыдлун бара чужө,
Со кор збодерөн лоө чужөм,
Со кор морөсыд вынөн тырө...
Төдтөм вуджөрыс юысь быри.

ПОЛЫСЬ

Полысьыды, вөлөм, бурджык,
Төдмалі жө дыркодь мысьт.
Шуам, вуджас трукстыд нюр джын,
Сэссия косны оз нин лысьт.

Водзлань зырас. Эм пө сылөн
Балябөжас весиг син.

Келас-пырас нюдз нитш вылас,
Көть и сэні зыбучин.

Воас оз ли мөдлапөлө —

Ёна майшасьны оз мөд.

Медым сөмын бөрын вөлі

Нюр, көн ваыс сир кодь сьөд.

ӨТИ ВОЙ

А туйын медбур колявны кузь войястө,
Пыр кытчөкө да мунысь-нырчысь
поездын.

Тэ рытнас олін чужан грездса сынөдөн,
А садьмин — тэнсьыд өшинь кар нин
тшынөдө.

Тэ вөлін төдса быдөнлы дзик төрыт на,
А талун лоө асьтө сөмын көритны,
Мый воин сэтчө, көні "йөзөн" шуоны,
Да көні тэ кодыс кыз кодзувкотьяс жуоны.

И весьшөрө тан корсьны вокьяс-чойястө,
И некоді нянь-солөн тан оз чолөмав,
И өти войсьыс, кодөс вуджан поездөн,
Тэ, ичөт мортөй, тшукан ыджыд олөмө.

ВОЙСЯ ЗЭР

Чардби енэжсө оз поткөд,
Рутор кыптө турунсьыс,
Бытгьө зэрсө печкө кодкө
Медся небыд вурунсьыс.

Вөрті, йөрті, улич шөрті,
Керка-карта дорьясөд
Гартчө шөртыс, пушыд шөртыс
Дэбыд ваа шорьясөн.

Мыйкө кыө небыд шыөн
Төвруыс му пасьтала.
Муыс, кодыр кыптас кыа,
Мича дөрөм пасьталас.

БУР АСЫВ

Асылыс плавгысис гулыд и сөдз,
Дорняся пыжын и нинөм ог вөч.
Дэбөдө табъясөс небыдик гы,
Өшалө ю весьтын ланьтөдан шы.

Польскыштө кок улын весьт кузя сын,
Войнас мый кутчысис-шедіс, эз мын.
Койыштны васө оз эбөсөй сюр,
Дорняся пыжын, и меным зэ-эв бу-ур.

АР

Ме талун вöлі корысьөн,
Ме кевми улич шöрын.
Эг чайт, мый мөрччас норасьём,
Но кодкö локтис корöсьөн
Да мöдiс шöйтны йöрын,
 Да зельöдчыны ыргөнөн,
 Да тоньöдчыны эзысьөн,
 Да кышакывны зарниён—
 И вунис коран мог.

СЕРЪЯС

Арыс, арыс кымын рёма!
Пуяс вижось, ваыс съод.
Пыжын чери эзысь съома,
Пөртйын енэж кодь лөз чөд.
Ыргөн кыша өтка керъяс
Сэн, көн зарни лыа көдж.
Аддза өшкамөшка серъяс
Ас руд вуджөр вылысь тшөтш.

КОЛЬӨДЧӨМ

Лэбанныд. А тiян бөрся кольө
Тырыс дзодзөг кок туй вадор ольө.
Тырыс кок туй кольө кушмөм борйө —
На кодьось дзик кельдвiжов коръяс.

Лэбанныд. А енэж лөня чирйө
Юсьлөн гөн кодь небыдик лым чиръяс.

Лэбанныд. И юргө ылө-ылө
Таво кежлө тiян бөръя сьылөм.

Тайө горыс аслас сөстөм шогөн
"Аддзысьлытөдз!" лоө коми ногөн.

СЕРПАС

Еджыд-еджыд лист вылын
Дзоридз тыра доз.
Кывбур пыдди, висът пыдди
Кисьмём пельсь роз.

Мөвпгяс пыдди — коръясыс,
Быдөн — бобув борд.
Серпасторсö нимтöма:
"Арся натюрморт".

КЫВ

"Менам кывъясöй—менаm вир тусьяс..."

Тима Вень

Парма чуркса косьтыс
Юсö помся помö.
Гашкö, тасянь босьтіс
Ассьыс нимсö Помös?
 Юыс бердын чужö
 Дзор Тиманлön Мичлун.
 Гашкö, тані вужйыс
 Тима Веньлön вичлы?
Кисьмöm вотös усьö
Вир тусь моз му сывйö.
Гашкö, тайö тусьыс —
Тима Веньлön кывйыс?

МУЗАКӨД

Куткыртчисны гулюяс
Öшинь сайын.
Зэрö-шлявгö ывлаын,
Быттö майын.
А öд төвлөн шöрыс нин,
Пасьяс новлам.
Дас во чöжнас öтчыдысь
Тадз пö овлö.
Сэтчö, көн Останкино
Енэж пыкö,
Дзоргам тэкöд öшиньöд,
Тэкöд кыкөн.
Гулюяс моз куткыртчим...
Сэзьдас регыд.
Төвся зэр. Останкино...
Олышт мекöд.

КЫДЗ ПУ

Быттьö кодкö перйис корöсь нöб —
Öти войөн кыз пу пасьтөг колис,
И оз шонты сйöс кок ув вольöс,
И зэв дыр на толаыс оз тöб,
И, көть эмышт зарни: зили-зёли,
Небыд эшкын сы вылö он ньöб.

ӨТНАМ

Вөр керка весьтын еджыд тшын —

Оз здукөн ломзы пишу пескыд,

И няньой коли тупось джын,

И мый друг везитас, ог эскы.

И сьолөм вылын сэтшөм нор,

Сьод вөрлөн шувгөм йиджө лолөдз.

Да, йөзысь ылын өтнад кор,

Сэк көть нин понйыд орччөн колө.

МОЙД

Кор ойбыртас мудз парма,
Да дзугсяс вöрас лöнь,
Да тöлысьлөн виж чарла
Шарс вундас лунлысь вöнь,
Зэв гусьөн кызкө ойдö
Дзик гөгöрбок выль мойдөн,
Кöть мойдысьыс — дзор Вой тöv
Оз востлы вомсö скöнь.

ТУЛЫС

Винёв сьодбөжөн вирдыштіс төв,
Войпель вунөдіс ышнясян русө.
Татшөм кадө став пармаыс чөв,
Асъя ун быттьө шымыртіс мусө.
Торкө чөвлунсө войтва: тәп-тәп,
Коді вөр керка вевт помысь мынө.
Быттьө пөсялөм пөль кыскө ноп
Васөд толаөн личкөм важ стыныс.

ТЭ ЛОКТИН...

КУПАЛЬНИЧА

Мича жö нин, ок и мича

Купальнича.

Чöскыд көрөн керка тыри,

Шогöй быри.

— Мужичöйлы дзоридз козин

Öмöй позьö?

— Позьö, позьö татшöм лунö,

Кодыр мунан.

Лысва войгьяса виж дзоридз меным сетин.

Гашкö, тайö абу лысва —

Синва петис...

ВЕНЗЬӨМ БӨРЫН

Еджыд байдөг кыз репасө пырө,
Сунін эшкынө тэ юр выв тырөн.
А ме орччөн жө — пукала чөла,
Кевма, унмыд мед чөскыдөн вөлі.

Сөмын вольпасьлөн толаыс пиын
Байдөг борд моза шевкнитчис кыыд.
Тэныд, вөлөмкө, мусаник пөтка,
Көдзыд унмовсьны репасад өткөн.

КЕДЗОВТӨМ

Кор тэнö эновтöны мусаяс,
Кор парскö сибьдджык да ён,
Дась мунны ва саяс и му саяс
Да выльысь шедöдны бур дон.
Мед öдйö кöдзалисны тэ динö,
Оз, вöлөм, унаыс и ков:
Дзик ставнас асьтö налы сетин и—
Тэ лоин кедзовтана лов.
Кöть абу тэ, а найö вузаяс,
Но мыждысян, кыз вöтлөм пон,
Кор тэнö эновтöны мусаяс,
Кор парскö сибьдджык да ён.

РӨК

Менө төрыт гадайтис чиганка,
Сөмын мыйсө дзодзулыд эз висьтав...
Збыль кө шуис шыла синма Ванга,
Сідзкө, водзө дыр на ола-сизьда.

Ылөдліс кө кийсь олан пасыс
Кыкнаннымөс — дзодзувсө и менө,
Шоныд зэр мед ваяс енэжтасас
Рөклөн кымөр.

Мый нин вөчан сэні?

ТЭ ЛОКТИН...

...И өшиньö пипуяс дзоргисны,
И сөнiксö ыркыда кисьтiсны,
И кöдзыдсьыс некыдзи дорйысьны,
И некодлы бöрдыштны-висьтасьны.
И лов шы эз сывды нин гыöрсö,
И керкаысь вöтлыны кымöрсö
Ме öтнам эг вермы нин, эг.
Но шоглунöй сайöдчис сэк,
Кор дзуртыштысь öдзöсöд пырин
Да чöвтiн: — со вои жö дырөн...

МӨВП

Талун асыв бара на ме радейтча,
Муслун биö юр выв тырөн суна.
Абутöмсö эмөн вöчны надейтча,
Яндзим тöдтөг дзик став грек пыр муна.

Меным веськодь, мый кöть сэсса шуасны,
Гажтöм овны черань везья олöмөн.

Бордья вöвьяс лэбöдасны-нуасны
Вöля дорö — сöмын сийö колö мен.

Сьöлөмöй оз öшйы инас, маитчö,
Унатор мен вöзийö пансысь луныс.

Талун асыв бара на ме радейтча,
Яндзим тöдтөг дзик став грек пыр муна.

КӨСЙӨМ

Дзик быд помсянь заводитчө мыйкө.

Өти кодзув кусө, өзйө мөд.

Олөм бөжыс ассьыс юр эз кый кө,

Сэки бырис эськө ловъя рөд.

Кодарын ме: олөм бөжас, юрас?

Коді чужас, менө вежны мед?

Мунас мекөд эскөм кө быд бурас,

Лөклы эскөм медем оз жө пет.

ЕДЖЫД ДА СЪӦД

Мам	3
"Кедзовта ме чужанінӧс ёна..."	4
Гӧсть	5
Вильыд	6
Гортӧ	7
Паметь	8
Йитӧд	9
Дӧваяс	10
Верстьӧ синъясӧн	11
Мыйла?	12
"Еджыд вичкоас пыравны мен..."	13
Эскӧм	14
Еджыд да съӧд	15

Чужи мортӧн

Висьтасьӧм	16
Чужи мортӧн	17
Ӧчки пыр	18
Вежӧгтӧм	19
Ним	20
Кодзункот	21
Водзасьӧм	22
"Велӧдчыны съӧкыджык..."	23
Ылын	24


Вуджөр	25
Полысь	26
Öти вой	27

Серъяс

Войся зэр	28
Бур асыв	29
Ар	30
Серъяс	31
Кольöдчöм	32
Серпас	33
Кыв	34
Музакöд	35
Кыз пу	36
Öтнам	37
Мойд	38
Тулыс	39

Тэ локтін...

Купальнича	40
Вензьöм бöрын	41
Кедзöвтöм	42
Рök	43
Тэ локтін...	44
Мöвп	45
Кöсйöм	46



1100-

Литературно-художественное издание

Вячеслав Леонидович БАБИН

ОТРАЖЕНИЕ

Стихи на коми языке

Редактор А. В. Тентюков. Художник В. А. Моторин. Художественный редактор В. Б. Осипов. Технический редактор А. Н. Вишнева. Корректор Н. Ф. Габова.

ЛР № 010039

Сдано в набор 7.12.94. Подписано к печати 16.01.95. Формат 70+90¹/₃₂
Бумага №1. Гарнитура "Baltica". Печать офс. Усл. печ. л. 1,76. Усл. кр.-отт.
2,0. Уч.-изд. л. 0,84. Тираж 1300. Заказ 4834. Коми книжное издательство.
167610, г. Сыктывкар, ул. Карла Маркса, 229.

АО "Коми республиканская типография". 167610, г. Сыктывкар, ул.
Первомайская, 70.